

SKIPULAGSSKRÁ

fyrir Minningarsjóð Erlendar Jónssonar og Mörtu Ágústsdóttur.

1. gr.

Nafn sjóðs, heimili og varnarþing.

Sjóðurinn heitir Minningarsjóður Erlendar Jónssonar og Mörtu Ágústsdóttur, í skipulagsskrá þessari nefndur sjóðurinn.

Heimili og varnarþing sjóðsins er í Reykjavík.

Sjóðurinn er í umsjá og vörslu Styrktarsjóða Háskóla Íslands og fellur undir sjóði sem eru í fjárvörslu þeirra.

Sjóðurinn starfar á grundvelli laga nr. 19/1988 um sjóði og stofnanir sem starfa samkvæmt staðfestri skipulagsskrá. Sjóðurinn er sjálfseignarstofnun en mun ekki hafa með höndum atvinnurekstur.

2. gr.

Tilgangur og markmið sjóðsins.

Tilgangur sjóðsins er að efla stöðu íslenskunnar almennt og styrkja nemendur í íslensku, bókmenntum og ritlist við Háskóla Íslands. Sérstaklega skal stutt við verkefni er lúta að ritfærni og þjálfun nemenda við beitingu íslensks máls sem og við skapandi verkefni nemenda, s.s. ritlistarverkefni og hvers konar bókmenntasköpun á íslensku. Sjóðurinn er opinn nemendum bæði í grunnnámi og framhaldsnámi við Háskóla Íslands.

3. gr.

Stofnframlag og tekjur sjóðsins.

Stofnframlag sjóðsins er kr. 10.000.000, sem er gjöf Mörtu Ágústsdóttur, kt. 290628-3509.

Aðrar tekjur sjóðsins eru eftirfarandi:

Vextir og arður af eignum sjóðsins.

Fé og annað verðmæti sem safnast í nafni sjóðsins, s.s. frjáls framlög einstaklinga, félagsamtaka eða fyrirtækja auk fjármagnstekna af eignum sjóðsins.

Sjóðurinn tekur við gjöfum og frekari framlögum, hvort sem er frá stofnaðila eða öðrum þeim sem vilja veita markmiðum hans brautargengi skv. 2. gr.

4. gr.

Stofnendur sjóðsins.

Stofnandi sjóðsins er Marta Ágústsdóttir, kt. 290628-3509. Sjóðurinn er stofnaður til minningar um Erlend Jónsson, rithöfund, íslenskukennara og bókmenntagagnrýnanda, og konu hans Mörtu Ágústsdóttur. Sjóðnum er ætlað að styrkja nemendur í námi í íslensku, bókmenntum og ritlist við Háskóla Íslands.

5. gr.

Stjórn sjóðsins.

Stjórn Styrktarsjóða Háskóla Íslands, kt. 571292-3199, sem skipuð er af háskólaráði í samræmi við reglur um varðveislu og ávöxtun eigna í umsjón Styrktarsjóða Háskóla Íslands, fer með stjórn sjóðsins. Stjórnin er skipuð þremur aðalmönnum og einum varamanni til þriggja ára í senn. Einn stjórnarmanna skal ekki vera starfsmaður Háskóla Íslands. Stjórnarmenn skulu vera fjár síns ráðandi. Háskólaráð ákveður hver gegni starfi formanns. Stjórnin fer með æðsta vald í málefnum sjóðsins, fjársýslu og eftirlitshlutverk hans. Formaður stjórnar skal boða til stjórnarfunda sjóðsins. Stjórnin heldur fundargerðir og skilar þeim til umsjónarmanns Styrktarsjóða Háskóla Íslands til varðveislu.

6. gr.

Úthlutunarnefnd sjóðsins.

Rektor Háskóla Íslands skipar úthlutunarnefnd þriggja aðila til þriggja ára í senn. Við skipun úthlutunarnefndar skal taka mið af tilgangi sjóðsins. Fulltrúar í úthlutunarnefnd skulu skipaðir að fenginni tilnefningu forseta hugvísindasviðs. Störf nefndarinnar/ráðsins eru ólaunuð.

Úthlutunarnefnd skiptir sjálf með sér verkum og velur sér formann og ritara. Hlutverk úthlutunarnefndar er að halda utan um úthlutanir úr sjóðnum og kynningarmál þeim tengd, í samstarfi við umsjónarmann Styrktarsjóða Háskóla Íslands.

Úthlutunarnefnd setur sér starfsreglur um úthlutanir, svo sem styrkfjárhæðir í samráði við stjórn sjóðsins, umsóknarfresti og ferli umsókna, innan ákvæða skipulagsskrár. Starfsreglur sjóðsins skal endurskoða reglulega.

Úthlutunarnefnd úthlutar styrkjum á grundvelli auglýsingar. Úthlutunarnefnd tekur ákvörðun um styrkuppþæð og einstakar styrkveitingar í samráði við stjórn sjóðsins, að fenginni ráðgjöf frá sérfróðum aðilum ef þörf er á, í samræmi við starfsreglur. Við styrkveitingar skal taka mið af tilgangi og markmiði sjóðsins. Auglýsing eftir umsóknum um styrki úr sjóðnum skal gerð á þann hátt að hún nái til sem flestra sem hún getur átt erindi við. Lögð skal áhersla á að auglýsa í þeim miðlum sem talið er hverju sinni að nái til viðkomandi hóps. Þetta skal gera á hverju ári. Öllum umsóknum skal svarað og umsækjendum skýrt frá úthlutun ársins. Úthlutunarnefnd kemur saman að minnsta kosti árlega.

Úthlutunarnefnd heldur fundargerðir og skilar þeim til umsjónarmanns Styrktarsjóða Háskóla Íslands til varðveislu.

7. gr.

Umsýsla og endurskoðun sjóðsins.

Styrktarsjóðir Háskóla Íslands annast ávöxtun sjóðsins og skal hún vera sem hagkvæmust og í samræmi við fjárfestingarstefnu Styrktarsjóða Háskóla Íslands á hverjum tíma.

Reikningsár sjóðsins er almanaksárið. Endurskoðendur sjóðsins eru endurskoðendur Styrktarsjóða Háskóla Íslands. Reikningar sjóðsins skulu birtir með sama hætti og annarra sjóða í vörslu Háskóla Íslands.

8. gr.

Breyting skipulagsskrár, sameining og niðurlagning.

Ekki er hægt að leggja sjóðinn niður eða gera breytingar á hlutverki hans og tilgangi af öðrum ástæðum en kveðið er á um í lögum og í skipulagsskrá og ekki án þess að sjóðstjórn og rektor Háskóla Íslands séu einhuga um þá ákvörðun. Slíkt skal borið skriflega undir sýslumanninn á Norðurlandi vestra.

Verði sjóðurinn lagður niður skal fjármunum hans varið í samræmi við markmið og tilgang sjóðsins í 2. gr. skipulagsskrár þessarar.

9. gr.

Staðfesting sýslumanns.

Um starfsemi sjóðsins fer eftir því sem segir í lögum nr. 19/1988 um sjóði og stofnanir sem starfa samkvæmt staðfestri skipulagsskrá. Staðfestingar sýslumannsins á Norðurlandi vestra skal leitað á skipulagsskrá þessari.

Skipulagsskrá þessi staðfestist hér með samkvæmt lögum um sjóði og stofnanir sem starfa samkvæmt staðfestri skipulagsskrá, nr. 19/1988.

F.h. sýslumannsins á Norðurlandi vestra, 11. desember 2024,

Jakob Andri Þórarinsson.

Auður Steingrímsdóttir.